

2471
LE
MINISTRE
D'ESTAT
RESTABLY
ET IVSTIFIE.



A PARIS.

M. DC. XLIX.

LE
MINISTRE

DE
STAT

RE
TABLY

ET
JUSTICE



A PARIS

M. DC. XLIX.



LE MINISTRE D'ESTAT

rétably & iustificé.

QUE c'est vn estrange monstre que la guerre, elle n'est pas seulement l'un des fleaux de Dieu, mais elle est vne meschante & pernicieuse outrière, qui n'a point d'autre dessein qu'à mettre tout en trouble, & en confusion, pour ruiner & détruire toute la Nature. Pour satisfaire à sa cruelle enuie, elle ne produit pas seulement la peste, la famine, les horreurs, & les cruautés pour faire mourir les corps: Elle a encore cette lasche industrie, de tourmenter, & de persecuter les esprits des hommes, afin de ne laisser rien en eux, qui soit exempt de ses atteintes. N'est-ce pas elle qui fait parler la calomnie, qui fait naistre l'enuie, l'orgueil, la rage, le desespoir, & tous les autres vices les plus execrables? C'est cette affreuse Déesse, qui fait fouler aux pieds le respect que les Subjects doiuent à leurs Rois, à leurs Princes, & aux Heros mesmes qu'ils constituent pour l'administration de leur Estat, & l'affermissement de leur Couronne? C'est cette insolente Reine des meschans esprits, qui permet de tout faire & de tout dire, pourueu que les pernicieux effets aboutissent au mal, & non pas au bien.

Les plus fameux Empereurs de l'Antiquité, ont esté le but à ses traits, & les plus illustres Monarques modernes, & éclairez de la lumière du Christianisme, ont en vain essayé d'éviter ses coups par leurs bonnes mœurs, & leurs vertueuses actions; elle a aussi bien fait agir la mé-

944.03

M475m

872336

No. 2471

distance contre eux, que contre les autres, qui faisoient plus d'estat du vice que de la vertu. Les Puissances terriennes ont bien deub subir à l'esclavage de ses iniques loix; puis que les Euesques, les Archeuesques, les Primats, les Cardinaux, & les Papes mesmes, n'ont pû s'affranchir par leur sainteté de vie, de tomber en la puissance des langues médisantes, qu'elle tient à gage, pour aussi bien noircir de la calomnie, la Pourpre, les Crosses, les Mitres, & les Thiares, que les Sceptres, les Diadèmes, & les Couronnes.

Cette cruelle meurtriere, qui ne distingue point les Rois d'entre les autres hommes, & qui les couche aussi bien dans le Tombeau que les moindres de leurs Sujets; Cette ennemie irreconciliable de la concorde, & de l'union, qui ravage & deserte les campagnes, les vallons, & les montagnes, qui desole les bourgades, les villes & les citez, qui ne s'efforce qu'à ruiner tout par vn deluge vniuersel, qui rougit bien souuēt les fleuves, & qui abreuve la terre: En fin cette inexorable aduersaire de toute la Nature, ne vient-elle pas fraichement de nous donner des témoignages sensibles des choses que ie viens de toucher cy-dessus?

Les Parisiens, & toute la France mesme, n'ont que trop esprouué à leur dommage les maux qu'elle fait pour douter de la verité que l'auance, & les villes de S. Denis, de Brie-Comte-Robert, & les Bourgs de Meudon, de Charenton, de Bievre, de Nanterre, & tant d'autres, ressentent encore trop les sanglâtes marques de sa cruauté, pour pouuoir oublier les brigandages, les sacrileges, les incendies, & les violemens de filles & de femmes, que cette inhumaine a fait commettre par des barbares.

C'est cette mesme guerre qu'il a causé de la mes-intelligence entre le Roy & vne partie de ses Sujets, & c'est elle encore qui passant de cet Auguste Prince à son principal Ministre, a émeu le menu peuple (que les Anciens ont à bon droit nommé vne teste sans oreilles, le voulant
representer

représenter sans iugement, sans raison, & sans conduite) à médire sanglamment de cette Eminence le Cardinal Mazarin, autant chery & estimé autrefois de toute la France, comme depuis elle l'a eu en haine & en auersion.

Cette grande liberté que l'on trouue parmy les armes, a donné sujet à beaucoup de personnes de basse estoffe, de calomnier ce Prince de l'Eglise, avec autât d'impunité que de rage & de fureur, sans aucune autre raison, que l'animosité que leur fournissoit leur caprice, qui trouuoiten ce temps là dereglées, & prophanes les choses les mieux conduites, & les plus saintes. Il s'est trouué parmy les sçauans des personnes assez incōsiderées pour écrire sur du papier mille meschancetez de ce Ministre. Ces Aristarques ne pouuoient pas ciuilement s'en prendre au Monarque, il fallût s'adresser au principal Administrateur des affaires de son Royaume, afin qu'en blâmant le seruiteur on eust plus de iour à blâmer aussi le Prince.

Les Escriptuains ont cette puissance d'aussi bien oster la vie que de la donner: c'est pourquoy vn gentil Capitaine auoit accoustumé de dire, que les plumes des Escriptuains percent les cuirasses des gens-d'armes, & que par vn contraire effet, avec deux ou trois gouttes d'encre seulement, ils peuent prolōger la vie plusieurs siecles à ceux qui auront gagné leur bien-vueillance. Les hommes de lettres doiuent se ressouuenir que la sciencé rend l'homme glorieux & superbe, & pour cela ils ne la doiuent pas tenir cachée, ny s'en seruir aussi par vne vaine gloire: mais en profiter, & conformer leur vie à leur doctrine; puis que la science ne sert pas plus à vn homme médifant & vicieux, qu'un bon vin en vn mauuais tonneau.

Mais sans nous arrester à faire voir avec quel mépris & indignité ces mauuais Escriptuains ont voulu ternir l'honneur & la vie de ce Ministre d'Etat, par vn nombre infiny de libelles diffamatoires & de fueilles volantes, qui ont couru parmy les rues, montrons en quelle posture il est

venu à Paris, & quels emplois l'y ont amené, de quelle forte il a vécu en Cour, & quelle bonne ou mauuaise estimation il s'est acquise pendant le séjour qu'il y a fait.

Les personnes séparées du commun des autres, savent que ce fut le Pape Urbain qui le choisit dans Rome pour l'envoyer en France traiter d'affaires importantes entre Sa Sainteté & Sa Majesté Tres-Chrestienne Louis le Juste X I I I. d'unom. Ce Lieutenant de Dieu en terre, ce Pere commun de tous les Chrestiens, eust-il bien voulu élire vn tel personage pour l'envoyer vers le plus grand & le premier Monarque du monde, pour agir en des intrigues concernans l'honneur & la gloire du Saint Siege, si contre ce qu'on a nagueres publié de la basse naissance de ce Cardinal, Sa Sainteté n'eust sceu qu'il estoit issu d'une extraction noble & digne de l'employ où elle l'auoit mis? C'est vne consequence que ie tire en sa faueur, & que ie croy qui sera approuuée des gens sages, vertueux, de naissance, & des-interessez, pour montrer que la premiere atteinte de la calomnie luy a faussement imputé vn deffaut qu'il n'a pas.

En moins de rien cét illustre Agent se fit de telle sorte admirer, & par leurs Majestez, & par toute leur Cour, & par tout le peuple mesme, de l'une & de l'autre condition, tant sa mine, sa façon d'agir, & toutes ses autres actions estoient trouuées agréables, qu'un chacun luy donnoit des loüanges. Son train, son équipage, sa dépense & l'estime qu'on faisoit de luy, monstroient bien qu'il n'estoit pas issu d'une race ravalée comme on a depuis dit: mais bien d'une Maison noble & fort recommandable; puis qu'on l'auoit choisi pour vne commission, & vne entreprise si glorieuse.

Il trouua vn fort facile accez auprès de leurs Majestez, qui luy firent beaucoup de fauorables traitemens: Il trouua les mœurs des François, & leur conuersation si douce & si charmante, qu'il se porta d'inclination à honorer le Roy, la Reine, les Courtisans, les peuples, &

tout le Royaume, plus que toutes les autres choses du monde : Ainsi secrettement il consacra son ame & son cœur pour le seruice d'un Estat, qui luy sembloit plus glorieux, & meriter mieux que tous les autres.

Il en donne d'assez amples preuues, lors que l'Empereur & le Roy d'Espagne, ayans joints leurs forces ensemble pour détruire le Duc de Mantouë, & d'autres Princes les allies de la France, firent assieger Casal par ce grand Capitaine le Marquis de Spinola avec vne puissante armée, qui sema la terreur & l'effroy dans toute l'Italie.

Le Roy Tres-Chrestien ne pouuant pas souffrir que ses Allies fussent opprimez sans se mettre en deuoir de les secourir, & croyant qu'il y alloit de l'honneur de sa Couronne de maintenir ses Allies, fit vn armement si fort & si puissant, commandé par trois Generaux fameux & experimentez, qu'en dépit du Duc de Sauoye, qui voulut s'opposer à son passage, il força ses plus importantes places, passa les Alpes, & fit marcher ses troupes vers Casal, qui estoit si pressé qu'il n'en pouuoit plus, & estoit sur le poinct de se rendre. Le General Espagnol scauoit attaquer & deffendre des Villes, si Capitaine de son temps l'entendoit; il auoit pourueu à toutes choses pour se rendre maistre de cette importante place, dont il pensoit desia estre le vainqueur, lors que son Eminence d'apresent, le Cardinal Mazarin, faisant renaistre en luy cette forte inclination qu'il auoit pour la France, resolut de l'en empescher par les traits de son esprit, dont il se seruit fort à propos.

Nos trois Armées jointes ensemble estoient desia proche de Casal, resoluës de perir, ou de forcer les retranchemens du Marquis, & luy faire leuer le siege de deuant cette ville, quand le Cardinal Mazarin, qui auoit desia fait plusieurs allées & venuës, & au siege, & à nos Armées, representa avec tant de pieté & de compassion le malheur qu'il préuoyoit arriuer de ce furieux choc,

dont il témoigna appréhender à ce Chef, que les François fussent victorieux, attendu leurs grandes forces, qu'il rendoit par son discours beaucoup plus puissantes que celles de Spinola, & leur ferme resolution de vaincre ou de mourir, que ce vaillant, & insigne Capitaine, qui n'auoit iamais sceu que c'estoit, ny de terreur, ny d'appréhension, craignit à cette fois d'estre surmonté. Relaschant vn peu de sa vigueur accoustumee, & se laissant tromper à la fausse opinion qu'il conceut, que l'entrepreneur fust plus Espagnol, que François, il arresta dans son esprit, apres auoir consideré qu'il perdoit l'Estat du Roy d'Espagne, s'il attendoit qu'on le forçast dans ses retranchemens, & qu'on secourust la place assiegée, de leuer le siege, plustost que de faire vne tentatiue, dont l'euuenement ne luy sembloit pas seulement douteux, mais encore funeste à son party, à sa gloire, & à sa reputation.

Tandis les trois Armées Françoises auançans chemin vers le Camp ennemy, & estans à la portée d'vn coup de mousquet des retranchemens, cependant que l'Agent François conféroit avec le Chef Espagnol, obligea celuy-là, de quitter celuy-cy, pour s'aller opposer à la marche de nos Troupes, & les prier de temporiser vn peu, & iusques à ce qu'il eust acheué de refoudre le Marquis de Spinola, qu'il auoit fort ébranlé, à leuer le siege.

Cette demande fut trop iuste, pour luy estre refusée, il va derechef tout en sueur, & hors d'alaine, trouuer le Marquis, auquel plus fort que iamais, il representa si bien la victoire asseurée des François, s'il attendoit leur attaque, veu leurs forces, plus grandes que les siennes, & leurs gens frais & resolu, que ce grand Chef de guerre se laissant charmer à l'eloquence de cet Orateur, aima mieux preferer son salut à sa perte, & leuer le siege volontairement, que d'y estre forcé, & taillé en piéces.

Ainsi sans coup frapper Casal fut deliuré: car le Marquis de Spinola faisant battre aux champs, en bon ordre,
& aban-

& abandonnant la place, les François s'emparerent aussi tost des retranchemens des ennemis, & au moyen de ce grand homme, qu'on a si fort mesprisé depuis peu, cette capitale du Montferrat fut des-assujettie de la tyrannie où elle estoit sur le poinct d'estre reduite.

Ce seruice rendu à la France par le Seigneur Mazarin fut trop important à l'Estat, pour n'estre pas reconnu de bonne sorte. Le Cardinal de Richelieu, qui de ce temps-là estoit le premier ressort, qui par ses auis & ses conseils, faisoit agir toutes les affaires du Royaume, fust ce pour la Paix, fust ce pour la guerre, en fit hautement considerer ce Romain par sa Majesté victorieuse, qui le regala avec tant de liberalité & de remerciemens dignes d'un si grand Prince, que dès cette heure là celuy que l'on gratifia si auantageusement, se fit François d'ame & de cœur, & quittant Rome se vint établir dans ce Royaume.

C'est où tous les François l'ont veu demeurer plusieurs années, & agir aux affaires de l'Estat, sous les regles du feu Cardinal de Richelieu, qui connut tant de solidité dans cet esprit, qu'en faisant vne estime particuliere de luy, il l'employa en des choses assez importantes & difficiles, pour n'estre confiées par ce grand homme, qu'à vne personne dont il connoissoit la capacité. Il fallut que ce grand Genie du Royaume connust vn excellent merite en la personne du Seigneur Mazarin, puis qu'il employa tout le credit & l'autorité de son Maistre, & le sien, pour l'admettre au sacré College des Cardinaux. Vn chacun sçait comme, sans murmurer, il fut receu en cette éminente dignité, où il s'est tousiours fort prudemment maintenu. Le Reuerend Pere Ioseph Capucin, qui se connoissoit bien en esprits, vantoit par tout celuy cy, pour l'un des meilleurs du Royaume. De ce temps-là l'on parloit si aduantageusement de ce nouveau Cardinal, que quelque chose que pût entreprendre le Roy, de glorieux, par les auis de son premier Mi-

nistre, il y auoit tousiours quelque part, par la croyance que tout le monde auoit que ce nouveau François contribuait tousiours quelque chose du sien à ces heureux succez.

Il a tousiours vescu en certe haute estime, & pour confirmer l'excellence de son esprit, le Cardinal de Richelieu reconnoissant ne pouuoit plus viure, crût estre obligé en conscience auant mourir, de supplier tres-humblement le Roy de le faire apres sa mort son successeur à l'administration de l'Estat, & de l'establir pour son premier Ministre. Ce Prince qui croyoit au Cardinal de Richelieu comme à vn Oracle, luy promit si religieusement d'admettre ce Cardinal en sa place, que dès que son ame fut séparée de son corps, il executa sa promesse, & se deschargea sur luy de toutes les affaires de son Royaume, qu'il luy mit entre les mains, comme il auoit fait entre celles du feu Cardinal.

Sous sa nouuelle administration nous prismes plusieurs places sur les ennemis, nous remportâmes plusieurs victoires sureux, & il réussissoit si heureusement à tout ce qu'il entreprenoit, que nostre Auguste Monarque connoissant par la dernière de ses maladies, que Dieu vouloit luy faire changer son Royaume terrestre en vn celeste, où il le vouloit attirer à sa Gloire, laissa auant sa regrettable mort, par testament à la France, la continuation de la dignité de premier Ministre d'Estat au Cardinal Mazarin. C'est où il a parfaitement bien agy depuis, & le peuple n'a commencé à le décrier que lors que l'extrême necessité du Royaume a contraint les Ministres de tout entreprendre pour recouurer des Finances pour subsister, & les employer à la guerre, dont elles sont le nerf.

Alors les peuples de la campagne, où l'on fit des leuées d'argent, & les citoyens des villes mesmes, qu'on ne pût pas espargner, fust-ce aux petites & aux grandes, commencerent à se plaindre, & sans considerer que cet

amas de trefors ne se faisoit que par l'autorité du Roy, & par l'aduis de tout son Conseil, on ne laissa pas de fulminer contre son Eminence seule, & de luy imputer ce blâme, quoy que s'il eust esté iuste de luy en donner, il estoit bien raisonnable que beaucoup d'autres personnes y eussent part.

Au lieu que le temps deuoit adoucir cette émotion, il ne la fit qu'émouuoir dauantage, parce qu'au lieu de soulager le peuple, les importantes affaires de la guerre d'Allemagne, de Catalogne, d'Italie, & de Flandres, fournissoient tous les iours de nouueaux moyens pour l'incommoder, & c'est ce qui augmenta le mal au lieu de l'adoucir.

Ce qui a le plus obligé les Citoyens de Paris à auoir auersion pour cette Eminence, a esté la prison de Messieurs de Broussel & de Blanmenil, que sa Majesté fit captifs, pour des raisons qui sont inconnûes. La memoire de ce qui se passa sur ce sujet est encore trop ressentie pour en vouloir faire icy la description, il me suffira seulement de dire, qu'avec cette action il s'en est fait tant d'autres, qui n'ont pas contenté les Parisiens, que nous en sommes venus aux malheurs, d'où il n'y a pas long-temps que nous sommes déchargés.

Il est vray que pendant le blocus de Paris, qu'il a plu à leurs Majestez de commander de faire, le Cardinal Mazarin a tousiours esté à Saint Germain auprès de leurs Personnes sacrées. En quel lieu plus conuenable le pouuoit-on voir, que d'estre près du Roy, de la Reyne, des Princes du Sang, & de tous les principaux Officiers de la Couronne? Y a-t'il à croire que cette Eminence seule, pour affliger cette grande Ville, la Reine de toutes les autres, au point qu'elle l'a esté, aye eu le credit & l'autorité de faire mouuoir à son gré, tant de Puissances qui sont au dessus de la siene, que nous auons veuës si fort animées pour la destruction de cette Cité, pour sa vengeance particuliere? Que

ceux qui ont eu, & qui auront cette opinion, se détrompent, & qu'ils sçachent que parmy tant de Princes du Sang & de grands Seigneurs, dont la Cour est composée, il y a eu des mécontents, & qui ayans imputé les premières Barricades des Parisiens à vn ouurage de désobeissance, l'ont fait passer pour rebellion dans l'esprit de leurs Majestez, & comme telle leur ont fait trouuer juste d'en chastier les coupables, & les auteurs, par la guerre qu'on leur a faite. Ainsi ne peut-on ny ne doit-on pas accuser seul le Cardinal Mazarin de cette entreprise; puis que nous auons éprouué, à nostre dommage, que d'autres personnes encore beaucoup plus considerables que la sienne, la fauorisoient trop puissammēt, pour n'en estre pas crû les principaux auteurs. Il ne faut pas douter que son Eminence estant l'un des principaux membres de ce grand & puissant corps, n'y ait contribué du sien tout ce qui luy a esté possible: que pouuoit-il moins faire, que de fauoriser le party qu'il voyoit armé pour se vanger, & pour le maintenir? Tant y a que s'il a contribué au mal, il faut confesser qu'il a aussi contribué au bien, & que si l'on l'a veu n'agueres fort zelé pour la guerre, que depuis on la veu fort affectionné pour la paix.

En fin, comme cette belle Astrée, par les bontez de nos Majestez sacrées, nous a mis en tranquillité, de mesme cette adorable Deesse a semblablement remis & r'estably en ses honneurs & en ses dignitez accoustumées, le Cardinal Mazarin, dont deux Arrests notables l'auoient depouillé. Tellement qu'aujourd'huy les veritables François, ont autant de sujet de faire estime de luy, qu'autrefois, veu qu'il est le mesme homme, le mesme Ministre d'Estat, & le mesme amy du Parlement qu'au passé, mais beaucoup plus affectionné pour le bien & pour le soulagement des peuples qu'il n'a iamais esté, & c'est dont il nous en veut donner des preuues si certaines, qu'il n'y aura plus moyen d'en douter.

Ceszez

Cessez donc Escriptuains, qui cherchez d'acquérir de la renommée par vos écrits scandaleux, de noircir plus vostre papier de calomnie contre cette Eminence: Imittez Saint Augustin; faites des retractations, & si vous desirez auoir du renom trauallez à faire quelque chose de grand & de loüable. Disposez vos plumes à écrire toutes les belles actions que ce Cardinal fera à l'aduenir pour l'auantage du Roy, pour sa gloire, & pour le soulagement de toute la France; comme par vos injures vous auez acquis sa disgrâce, par vos loüanges vous gagnerez sa bien-vueillance. Je sçay bien que tous les sçauans aspirent par leurs écrits d'auoir de la gloire, comme estant le legitime salaire qui est deub à leurs peines, & qu'il n'est personne qui ne soit bien aise de laisser son nom en bon odeur à la posterité. L'on dit qu'un certain Escriptuain mit vn iour en lumière vn petit ouurage intitulé, *Le mespris de la Gloire*, où il s'efforçoit de prouuer que c'estoit vne vanité indigne d'un honneste homme, d'aspirer à la gloire par le moyen de ses oeures. Mais cet Auteur fut depuis accusé d'auoir commis la faute qu'il blâmoit en autrui, puis que son nom estoit mis en la premiere page, & au front de son Liure; ce qui donnoit bien apparemment à connoistre, que s'il eust veritablement mesprisé la gloire, comme il vouloit persuader aux autres, il eust fait imprimer son Liure sans son nom. Les Escriptuains qui s'occupent à croire de belles & bonnes choses, se rendent recommandables eternellement, & l'on sçait bien que les faits des grands Capitaines meurent avec eux, s'ils n'ont quelqu'un qui les mettent par escrit. C'est ce que reconnut bien Alexandre, lors qu'il nomma Achille heureux, pour auoir trouué vn excellent Escriptuain de ses faits. Il ne voulut dire autre chose par là, sinon qu'il desiroit pareillement rencontrer quelque Historien qui fit vn Liure de ses conquestes, & de ses exploits glorieux, sans quoy il sçauoit bien que la memoire ne se conserueroit pas long-temps.

Puis que la souuenance de toutes les choses passées est noyée dans l'oubly, que le Roy est en fort bonne intelligence avec son Parlement de Paris, & avec tous les autres, que tout est vny, en concorde, & en Paix, sans iamais auoir crainte d'une nouuelle guerre: Que Paris a eu l'honneur & la gloire de voir tous les Princes & toute la Cour (à la reserve de leurs Majestez) en sa ville, depuis la Paix: Qu'en peu de iours, aydant Dieu, nous verrons icy de retour le Roy, la Reyne, & leur Royale famille; Rendons graces au Ciel d'un si heureux changement, & que desormais nos cœurs & nos langues, n'ayent plus de mouuemens que pour chanter ses loüanges, & non pas pour ternir l'honneur, ny la reputation de nostre prochain. Je tiens pour tout certain, que si les vrais François desormais, honorent, cherissent & reuerrent, comme ils doiuent, le Roy, la Reine, les Princes, les Ministres d'Estat, & ceux de la Iustice, que Dieu les recompensans de mille gratifications, leur fera naistre vn siecle d'or, qui leur fera iouïr d'autant de bonheur, & de prosperité à l'aduenir, qu'ils ont n'aguères resenty par leur diuision, de maux, de tourmens, & de peines.

F I N.

